

Munconza da schelta ni malcuntentientscha?

Vuschs nunvaleivlas en elecziuns a Lumnezia, Ilanz/Glion e Medel/Lucmagn

MARTIN GABRIEL/FMR

■ Cedels vits e nunvaleivels en elecziuns communalas ei nuot special. La dumengia vargada hai denton dau en treis vischnauncas sursilvanas – Lumnezia, Ilanz/Glion e Medel/Lucmagn – numerusas vuschs ch'ei idas «sper» ils sulets candidats vi. La FMR ha tschercau raschuns e reacziuns. Ella vischnaunca Lumnezia ei *Renzo Blumenthal* vegnius elegius la davosa fin d'jamna en suprastonza communal cun in resultat da 236 vuschs. Dallas 552 vuschs entradas ein 80 stadas nunvaleivlas e 236 persunas han mess il cedel vid en l'urna. La presidenta communal da Ilanz/Glion, *Carmelia Maissen* ei vegnida reelegida cun 774 vuschs. Dallas 1336 vuschs inoltradas hai dau 180 vuschs singulas. Ed il niev president communal da Medel/Lucmagn, *Claudio Simonet*, ei vegnius elegius, ha denton retschiert 18 vuschs nunvaleivlas da 195 entradas. Ein vuschs singulas ina munconza da schelta ni vuschs da protesta?

Di d'elecziun ei di da paga

La presidenta communal da Glion, *Carmelia Maissen*, ei satisfatga da siu resultat d'elecziun da dumengia vargada. Ch'entgins pertschiens dallas vuschs entradas mondien ad autras persunas seigi fetg normal. «Sco presidenta s'aida ei da prender posiziun e trer decisiuns. Quellas plain secapescha buc adina a tuts. E jeu hai ils davos treis onns e miez stuii s'exponer en differentas damondas e fastichentas da peisa sco per exempel la planisaziun locala: Clar, che quei cuosta ina vusch ni l'autra.» Da l'autra vart seigi ella s'engaschada activamein per la lescha da CO2. Quella seigi vegnida refusada



Tgei muntada han cedels vits en elecziuns communalas?

FOTO MARTIN GABRIEL

era ella vischnaunca Ilanz/Glion cun ina cumpart da 60%. Tenor ella hagi quella votaziun e siu engaschi era buca gest contribuü a siu resultat d'elecziun.

Per *Renzo Blumenthal* da Vella, anteriur Mister Svizra, eisi l'emprema gada ch'el ha candidau per la suprastonza communal dallas vischnaunca Lumnezia. El seigi cuntents cul resultat da 236 vuschs e vegli buca commentar quel. Era negin commentari tier ils 236 cedels vids e las 80 vuschs nunvaleivlas. «El temps dad oz ston ins esser leds, d'insumma haver persunas che stattan a disposiziun per uffecis publicis», ha *Renzo Blumenthal* detg enviers la FMR.

La vischnaunca da Medel/Lucmagn ha elegiu *Claudio Simonet* sco niev president communal. Per la tscherna dil president da Medel/Lucmagn han 18 da 195 votantas e votants dau ina vusch singula. «Jeu sun gia staus inagada president communal, in uffeci ch'ins fa buca mo

plaschers. Quei ei forsa era il motiv per las vuschs singulas a mia adressa.»

Vuschs ein segns ed ei dat duas pusseivladads

Per *Thomas Kollegger*, il menader digl Uffeci cantunal da vischnauncas, datti duas interpretaziuns pusseivlas per vuschs singulas tar elecziuns communalas. En biars scrutinis veglien singulas votantas e votants deponer lur malcuntentientscha ni critica enviers la vischnaunca ed ils ufficials.

E la secunda varianta seigi quella ch'ei detti negina schelta da candidatas e candidats, ed ei vegni perquei semplamein dau la vusch ad enzatgi auter. Tenor sia experientscha, di *Kollegger*, seigi ei aschia, ch'ils biars candidats sappien localisar precis daco ch'ei hagi dau vuschs singulas. Specialmein pertuccai dallas vuschs singulas seigien las presidentas ed ils presidents communalas.

«Ulteriura crappa periclitescha la via»

La via dil Pass dil Lucmagn resta serrada ils proxims dis

HANS HUONDER/FMR

■ La dumengia suentermiezdi ein rodund 150 meters cubics crappa – per part fetg gronda – curdai silla via dil pass dil Lucmagn. Tenor il menader dil district 6 digl Uffeci da construcziun bassa dil cantun Grischun, *Geni Duff*, pericliteschan ulteriurs rodund 800 meters cubics crappa il stradun. «Sin fundament da quella situaziun vegn la via ad esser serrada ils proxims dis. Con ditg che quei ei il cass savein nus buca», ha el detg sin damonda dalla FMR. Rodund diesch meters sur la via sesanfla ina sfendaglia. Sur quella ston denter 300 e 400 meters cubics vegnir allotanai, sper ils rodund 150 meters cubics che sesanflan gia en via. Mo quei ei aunc buca tut quei che caschuna fastedis als responsabels. «Sur la sfendaglia sesanflan ulteriurs 300 entochen 400 meters cubics grep che savessen rgunschamein

curdar en via», di *Geni Duff*. Il mument seigi la segirtad dil traffic buca dada aschia ch'ei seigi buca da patertgar d'arver la via. Il liug dalla bova sesanfla ella vischinonza dalla via che meina naven dalla via cantunala giu encunter il mir da fermada da S. Maria.

Controllas regularas

«Quei territori sco era auters cun greppa el-la Val Medel vegnan controllai regularmein da nus. La surfatscha cun greppa ei denton fetg gronda, gest en quei liug», puntuescha *Geni Duff*. Las preits crap ni plauncas vegnien adina puspei schubergiadadas per aschia prevegnir a curdada da crappa. «Quei cheu havein nus buca viu a vegnent. Igl ei in eveniment extraordinari, era per quei ch'igl ei stau bialaura ils davos dis. Podà che l'aua dalla neiv che liua sa haver giu in effect», di *Geni Duff*.



Quella sfendaglia pretenda d'allontanar ulteriuras parts dil grep sur via.

FOTO UFFECI DA CONSTRUCCIUN BASSA DIL CANTUN GRISCHUN

Tgei sa la scola da Flem far per promover il romontsch?

La geraua Sol-Britt Bonderer Imper ha dau risposta

AUGUSTIN BEELI/FMR

■ L'jamna vargada ha la Cuminonza romontscha da Flem envidau alla radunonza generala. El center da quella ei in referat dalla geraua dil scolaesser, Sol-Britt Bonderer Imper staus. Il gi da romontsch ei programmaus, e medemamein l'idea d'integrar el plan d'instrucziun lecziuns da romontsch. Avon in onn, il zercladur 2020, gest suenter l'emprema unda dalla pandemia, haveva la Cuminonza romontscha da Flem (CRF) beneventau il menader dalla scola da Flem, *Marc Cathomas*, a sia radunonza generala. *Marc Cathomas* haveva annunziiau a quella sentupada che la scola hagi in stradau in project da romontsch. Il termin era fixaus sil fevrer 2021. Per motivs plausibels ha il team da scola stuii stuschar l'occurrenza sil 2022. Che la scola da Flem vul veramein realisar quei accent, ha la nova geraua *Sol-Britt Bonderer Imper* puntuau l'jamna vargada. Ella ha priu part alla radunonza generala dalla Cuminonza romontscha da Flem.

FLF ha purschiu maun

Sco il president premurau, *Hanspeter Meiler*, ha rapportau, dumbra l'unien actualmein 108 members. Igl ei in bien triep glieud che sustegn activa- ni passivamein las stentas da tener allert quei ch'ei restau a Flem dil spért romontsch. Era sch'il tudestg ei il lungatg uffical da Flem e che quel dominescha, fa ei senn da salvar e promover il lungatg da Gian Fonta-

na. En biaras casas da Flem discuor'ins aunc adina romontsch. La CRF rimna ils Romontschs ed organischesa cun e per quels occurrenzas. Uonn cuntinuescha aschia *Claudia Margison-Casanova* cul Café Romontsch2021. Las sentupadas digl onn vargau seigien stadas in stupent success, ha la promotura regionala *Alice Bertogg* confirmau a caschun dalla radunonza.

Vinavon dat ei tochen gl'atun tschun guidadas «Tras gassas e streglias - laufend Romanisch lernen». Igl ei ina purschida che *David Flepp*, *Ruth Gartmann* ed *Alice*

Bertogg fan en collaboraziun cun Flem Laax Falera Turissem. Cun satisfacziun ha *Hanspeter Meiler* saviu rapportar ch'ins hagi saviu contrahar cun success cull'organisaziun turistica pervia dallas guidadas «romontschas» tras Flem. Quellas ein da niev integradas el program turistic dalla stad e digl atun 2021.

Attaschada al romontsch

Ils presents alla radunonza han approbau il program che la suprastonza ha presentau. Aschia dat ei puspei il cant aviert cun *Rica Maria Cathomen* ed era ils sur-

vetschs divins romontschs ella baselgia da Fidaz ha *Giosch Gartmann* saviu fixar.

Il bien spért ch'ins ha constatau a quella radunonza ha la geraua Sol-Britt Bonderer Imper accentuau. Dapi l'entschatta dil 2021 eis ella commembra dalla suprastonza communal, ella ha surpriu il departament da scola da siu antecessur *Peter Reiser*. En entelgientscha cul meinascola *Marc Cathomas* haveva lez in stradau in project da romontsch, pervia dalla limitaziun dil temps d'uffeci ha el denton stuii dar giu siu post politic silla fin digl onn. Sia successura ha ina relaziun specia-

la cul romontsch. Ils presents alla radunonza generala dalla CRF han s'encurschiu ch'ella ei attaschada a quel e ch'ella capescha tut. La tatta, che derivava da Morissen, ed ils geniturs d'origin lumnezian e da Sumvitg, discurreran romontsch. A Cuera seturpegiavan biars geniturs antruras da tschintschar romontsch ed igl era buca «schic» da dar vinavon il lungatg-mumma als affons. Oz ei la tenuta semidada. Cun ina purschida per tuts scalems vul la scola da Flem porscher in accent romontsch el plan d'instrucziun (mira scaffa).

Puspei romontsch en scola da Flem

La geraua dil scolaesser ed il meinascola da Flem han presentau alla radunonza genera l'idea d'ina instrucziun da romontsch per scolaras e scolars ch'ei bilings. Quella vulan ins integrar egl urari analog allas lecziuns «patria, lungatg e cultura» (heimatlicher Sprache und Kultur HSK). En quellas lecziuns san affons s'approfundir el lungatg, historia e cultura, geografia, fiastas, musica e tradiziuns da lur lungatg da derivonza. Sol-Britt Bonderer Imper beneventa ch'ins dat peisa a duas damondas: Inagada tgei che la scola da Flem sa contribuir per mantener e promover il romontsch. E lu co ins duei sustener ils geniturs da sviluppar la plurilinguitad da lur affons. Geniturs romontschs che vivan a Flem han en quei regard in scazi. A tal fatg vul la scola dar peisa. La gruppa d'affons ch'ins ha en mira ein affons cun romontsch sco lungatg-mumma ni lungatg-bab. Naven dalla secunda classa duoen quels saver frequentar ina gada ad jamna ina lecziun en ina gruppa mischedada cun scolars da tuttas classes. Finamira eis ei da praticar la plurilinguitad. Vinavon duei l'instrucziun approfondir e slargiar las competenzas el lungatg romontsch cun capir e discuorer, cun leger e scriver. Las lecziuns duoen vinavon rinforzar ils geniturs d'educar ils affons biling ed animar lezs da tschintschar romontsch era ordeifer lur ambient famigliar.



Sol-Britt Bonderer Imper (secunda da dretg), ensemen culla suprastonza dalla CRF, Hanspeter Meiler, Renata Jäger e Giosch Albrecht. Seniester il menader dalla scola da Flem, Marc Cathomas.

FOTO AUGUSTIN BEELI